

DOI 10.7251/VETJSR1902283M

UDK 637.62:636.32/.38

Originalni naučni rad

**MIKROSKOPSKA ISTRAŽIVANJA VUNSKIH VLAKANA PRAMENKE U CILJU
KVALITETNIJEG RAZVRSTAVANJA SIROVE VUNE**

Nadžida MLAĆO¹, Amela KATICA¹, Velija KATICA², Almira SOFTIĆ², Vedad ŠAKIĆ²,
Velida ĆUTAHIIJA^{1*}, Pamela BEJDIĆ¹, Nedžad HADŽIOMEROVIĆ¹, Jasmin KATICA³

¹ Veterinary Faculty University of Sarajevo, Deapartment of Anatomy, Histology and Embriology, Zmaja od Bosne 90, 71000 Sarajevo, Bosnia and Herzegovina

²Veterinary Faculty, University of Sarajevo, Department of Animal Science, Zmaja od Bosne 90, 71000 Sarajevo, Bosnia and Herzegovina

³Veterinary Faculty, University of Sarajevo, Department of Food and Nutrition of Domestic Animals, Zmaja od Bosne 90, 7100 Sarajevo, Bosnia and Herzegovina

*Corresponding author: nadzida.mlaco@yahoo.com

Kratak sadržaj: U Bosni i Hercegovini, Crnoj Gori, kao i većini zemalja Balkana, vuna predstavlja veliki ekološki problem. Nakon striže ovaca, farmeri obično ostavljaju vunu na mjestima striže što predstavlja teško razgradiv otpad organskog porijekla. Otkupna cijena takve, netretirane vune je veoma mala kao i njen kvalitet. Istraživanjem smo pokušali skrenuti pažnju na kvalitet vunskih vlakana pojedinih dijelova tijela, sa jednog drugog aspekta, što je u konačnici veoma bitno u tekstilnoj industriji i selekciji vune u daljoj preradi. Kutikulu čine orožale ćelije, ljuspice, koje se nalaze na površini runskih vlakana. Jedna od značajnih uloga kutikule je zaštitna. Naime, kutikula štiti vunsko vlakno od različitih vanjskih inzulta, bilo mehaničkih, fizičko-hemijiskih (kao što je isparavanje amonijaka u loše održavanim nastambama i sl.), koji mogu oštetiti runo, te ga na taj način učiniti manje kvalitetnim. Na istraživanim uzorcima runskih vlakana ustavili smo izvjesne razlike u položaju i obliku orožalih ljuspica, zavisno od dijela tijela odakle su uzorkovane. Međutim, mikroskopskom analizom uzoraka uzetih sa korijena repa, ustavili smo da su ljuspice znatno manjih dimenzija, finije građe u odnosu na raspored i izgled rožnih ljuspica sapi. U radu smo komparirali izgled, raspored ljuspica kutikule, što je veoma važno u procjeni kvaliteta vune, te njenoj daljoj upotrebi kao sirovine.

Ključne riječi: dubska, pivska pramenka, industrija, vunsko vlakno, kutikula

UVOD

U Bosni i Hercegovini i Crnoj Gori, kao i u većini država Balkana, proizvodnja vune u posljednjih dvadesetak godina gotovo da nema nikakvu ekonomsku važnost. Vuna je nus-proizvod, koji u posljednje vrijeme stvara poteškoće, jer vunu ovakvog kvaliteta gotovo je nemoguće prodati, pa ona postaje i ekološki problem.

U rasnoj strukturi ovaca u Bosni i Hercegovini i Crnoj Gori najzastupljenije su autohtone pasmine ovaca, koje se uglavnom odlikuju malom proizvodnjom vune po grlu, a vuna je lošeg i neujednačenog kvaliteta, slabe elastičnosti i valovitosti i nema garantovanih cijena odnosno poznatog i sigurnog otkupljivača. Nадалје, ovce se ne pripremaju za strižu, dok se sortiranje vune po kvalitetu uopšte ne provodi. Zbog lošeg i neujednačenog kvaliteta, većina proizvedene vune ne može se smatrati odgovarajućom za tekstilnu industriju, ali se može smatrati adekvatnom za proizvodnju drugih proizvoda (prekrivači, dušeci, tepisi, jastuci, suveniri, izolacioni materijali, itd.).

Prema podacima WTO-a, obzirom na dijametar vunskih vlakana, kao i njihov kvalitet, vuna predstavlja široko upotrebljivu sirovinu, prvenstveno u tekstilnoj industriji, građevinarstvu, poljoprivredi kao gnojivo ili materijal za malčiranje koji sprečava rast korova i uz to odlično


zadržava vlagu. Industrija ekoloških izolacionih materijala, kako termičkih, tako i akustičnih, koristi je u proizvodnji novih materijala otpornih na toplotu, koji imaju antistatičke i antialergijske osobine.

Vunska vlakna u runu ovaca predstavljaju kvantitativne, ali prije svega kvalitativne parametre u proizvodnji vune i određivanju njezine upotrebljivosti u daljoj preradi. Vlakna nisu jednakog kvaliteta, kako po hemijskom sastavu, tako i tehničkim karakteristikama, što umnogome zavisi o rasi ili soju, načinu uzgoja, zoohigijenskim uslovima, načinu ishrane, klimatskim uslovima, hormonalnom statusu i slično, (Savić i sar., 2007, Savić i sar., 2014). Našim istraživanjima nastojimo uzgajivačima ukazati na značaj klimatskih faktora i dobi na kvalitet vunskih vlakana autohtone pramenke (dubski i pivski soj), što će vjerovatno imati uticaja na ukupnu proizvodnju i iskorištenost sirove vune kao osnovne sirovine u zahtjevnoj tekstilnoj industriji. Još detaljnijim mikroskopskim istraživanjima vunskih vlakana domaćih pasmina ovaca, pokušali smo skrenuti pažnju na njezinu iskoristivost u različitim pravcima, od tekstilne industrije (proizvodnja cilima, odjevnih predmeta i sl.) do upotrebe u građevinarstvu, kao termički izolator.

MATERIJAL I METODE

Uzorke za mikroskopska istraživanja vunskih vlakana ovaca, dubske i pivske pramenke, uzeli smo sa dva različita lokaliteta, planina Vlašić – Bosna i Hercegovina i Pivska planina (Dubrjevići i Kovači Orah) – Crna Gora. Dinarsko gorje ima tri pojasa: Primorski,

Centralni, Sjevero-istočni, a u svakom od njih nalazi se više geografskih područja. Pivske ovce se uzgajaju u centralnom pojusu Dinarskog gorja, u geografskom području Durmitora i Sinjaljevine (B23, 24). Dubske ovce u sjeveroistočnom pojusu Dinarskog gorja u geografskom području Vlašića (C3). (Slika 1).



Slika 1. Područje uzgoja pramenke: Dinarsko gorje i geografska područja uzgoja pivske i dubske pramenke (Izvor: https://upload.wikimedia.org/wikipedia/commons/thumb/2/24/Dinaric_Alps_subdivisions_fr.svg/1265px-Dinaric_Alps_subdivisions-fr.svg.png)

Ukupno je uzorkovano vunsko vlakno sa 40 jedinki (po dvadeset sa svakog lokaliteta) i to 10 u proljeće i 10 u jesen sa svakog lokaliteta. Runo za mikroskopsku analizu uzeto je sa različitim dijelova tijela, korijen repa, plećka i sapi odsijecanjem pramenova uz samu kožu. Takvi uzorci, sa oba istraživana lokaliteta i u različitim vremenskim periodima (proljeće i jesen), stavljali su se u označene plastične vrećice do momenta mikroskopiranja. Prije mikroskopiranja, da bi se uklonile nečistoće, uzorci su se prali neutralnim sapunom, ispirali vodom, a zatim ponovo destilovanom vodom.

Radi mikroskopiranja i transparentnosti, uzorci su se postavljali u vodonikov-peroksid (H_2O_2) 24 sata, a poslije u ksitol 48 sati. Nakon toga, uzorci su ponovno ispirani u destilованoj vodi, nakon čega su ostavljeni da se osuše. Tako pripremljeni uzorci postavljeni su na predmetna stakla i uklapljeni u kapi glicerina, nakon čega su mikroskopirani.


Mikroskopiranja kutikule korijena repa, plećke, sapi sa različitim lokaliteta, vršena su binokularnim svjetlosnim mikroskopom (Motic 120M), pod uvećanjem 200 i 400 puta.

REZULTATI I DISKUSIJA

Vunsko vlakno se sastoji iz tri dijela: glavice (bulbusa), korijena i stabla (prava vlakna, dio vlakna pod kožom). Stablo je najduži dio vlakna i čini vunski pokrivač ovce (Katica i sar., 2010, Katica i sar., 2015). Vunsko vlakno je rožna tvorevina građena iz dva, ponekad iz tri sloja. To su pokožica (*cuticula, epidermis*), kora ili srednji sloj (*substratia corticalis*), srž (*substratia medullaris*).

Kutikulu čine orožale ćelije, ljuspice, koje se nalaze na površini runskih vlakana. Jedna od značajnih uloga kutikule je zaštitna (Kozarić, 1997). Naime, kutikula štiti vunsko vlakno od različitih vanjskih inzulta, bilo mehaničkih, fizičko-hemijskih (kao što je isparavanje amonijaka u loše održavanim nastambama i sl.), koji mogu oštetiti runo, te ga na taj način učiniti manje kvalitetnim. Na istraživanim uzorcima runskih vlakana ustanovili smo izvjesne razlike u položaju i obliku orožalih ljuspica, zavisno od dijela tijela odakle su uzorkovane, bez obzira da li se radilo o dubskoj ili pivskoj pramenki. Tako


na sapima (Slika 2), rožnate ljuspice naliježu jedna preko druge u kontinuitetu. Nepravilnog su oblika i podsjećaju na crepove krova. Obično je takav izgled kutikule vezan za grubu vunska vlakna. Nasuprot takvom izgledu kutikule, na uzorcima uzetih sa sapi i dubske i pivske pramenke, za očekivati je bilo da na korijenu repa imamo još grublju strukturu u rasporedu rožnatih ljuspica. Međutim, mikroskopskom analizom uzorka uzetih sa korijena repa, ustanovili smo da su ljuspice znatno manjih dimenzija, finije grade (Slika 3) u odnosu na raspored i izgled rožnih ljuspica sapi. Na rubovima runa uzetog sa korijena repa, može se uočiti i ljevkasti izgled rožnih ljuspica poredanih cirkularno (Slika 5), što je odlika finijeg i kvalitetnijeg runa. Uzorci runa uzetih sa plećke pokazuju na tzv. prelaznu formu kutikule (Slika 4). Orožale ljuspice su dosta velike, mnogougaone i gotovo da se jasno izraženi rubovi ljuspica spajaju jedna s drugom u jednu cjelinu.




Slika 2. Nativni preparat; x 400; sapi



Slika 3. Nativni preparat; x 400; korijen repa



Slika 4. Nativni preparat; x 400; plećka



Slika 5. Nativni preparat; imerzija; raspored ljuspica; korijen repa

Vuna je proizvod kože i predstavlja skup vunskih vlakana, specifične strukture i fizičkih osobina koje ih čine pogodnim za predenje (Mitić, 1984). Osnovna jedinica vune je vunsko vlakno, odnosno dio koji se nalazi iznad površine kože i koji se ekonomski koristi za proizvodnju tkanina i dr. Sva vlakna nisu jednaka po hemijskom sastavu, histološkoj građi, niti po tehnološkim odlikama (Mioč i sar., 2006). Vunska vlakna rastu iz papila smještenih u folikulima. Rast vlakana počinje krajem drugog ili početkom trećeg mjeseca intrauterinog razvoja jagnjeta. Vlakna izbjaju iz kože pojedinačno ili u grupicama. Pojedinačna vlakna povezuju grupice u Y snopice, pramenčice, pramenove i runo. Nakon prve striže vunska vlakna nisu više šiljasta (Vegara, 1991).

Sveobuhvatnim istraživanjem runa dubske i pivske pramenke, uzorkovanih sa različitih lokaliteta, različitih ambijentalnih uslova, te godišnjih doba, pokušali smo ustanoviti kvantitet, eventualne morfološko-histološke, odnosno kvalitativne posebnosti runa ova dva soja.

Istraživanja kutikule runskih vlakana su pokazala različitosti u rasporedu, obliku i nalijeganju jedna preko drugih kutikularnih ljuspica, njihovom kontinuitetu sa različitim dijelova tijela.

Kutikula dubske i pivske pramenke je generalno pokazivala nježniju strukturu u proljetnom periodu u odnosu na jesenji. Posebno kutikula korijena repa je bila ujednačene strukture uzoraka uzetih i sa jednog i sa drugog lokaliteta u pomenu tim periodima. Rezultati naših istraživanja umnogome će pomoći, prije svega uzgajivačima, jer će im dati izvjesne smjernice kada je u pitanju striža ovaca, koja mora uključivati prethodnu pripremu da bi se dodatno poboljšao kvalitet runa. Istraživanja su posebno zanimljiva za tekstilnu industriju, jer će se na osnovu dobijenih rezultata moći pristupiti ozbiljnog razvrstavanju runskih vlakana. Najgrublje runo se može koristiti kao ekološki prihvatljiv građevinski materijal zbog iznimno velikih vrijednosti debljine runskih vlakana sa pojedinim dijelova tijela. Dakle, ovčja vuna danas ne bi trebala biti „ekološki problem” već, upravo suprotno, vrijedna ekološka sirovina, koja će svoju primjenu naći u širokom spektru potreba.

ZAKLJUČCI

Izgled kutikule, vanjskog, zaštitnog omotača runskih vlakana je varirao u zavisnosti od regije tijela kako kod dubske tako i kod pivske pramenke. Rožnate ljuspice na sapima oba soja pramenke su podsjećale na crepove krova, jer su pravilno nalijegale jedna preko druge, što je odlika grubih vunskih vlakana. Međutim, kutikula korijena repa je bila nešto finije građe, rožne ljuspice su bile manjih dimenzija u odnosu na one uzorkovane sa sapi, a pri vrhu su se završavale ljevkasto. Na plećkama je preovladavala tzv. prelazna forma kutikule, gdje su rožne ljuspice bile uočljive, velike i mnogougaone sa izraženim rubovima koji se međusobno spajaju.

Mikroskopska istraživanja kutikule vunskih vlakana su pokazala različitost u mikrostrukturi i izgledu rožnih ljuspica. Kutikula uzoraka sa korijena repa bila je neočekivano finije građe, u odnosu na kutikulu sapi, ili plećke, oba soja pramenke. Rožne ljuspice kutikule na repu su manjih dimenzija i pravilno su nalijegale jedna preko druge u vidu ljevkova. Kutikula vunskih vlakana sapi je pokazivala grublju građu, dok je prelaznu formu predstavljala kutikula plećeve i kod dubske i pivske pramenke.

Rezultati istraživanja mogu pomoći uzgajivačima da pri striži ovaca, mogu odmah razvrsati vunu, te time usmjeriti sirovinu ka daljoj proizvodnji, namjenski.

LITERATURA

1. Katica A., Mlaćo N., Hasanbašić D., Hamzić E. (2010): *Osnove veterinarske histologije*. Univerzitet u Sarajevu, Veterinarski fakultet, Sarajevo.
2. Katica A., Mlaćo N., Šakić V., Šatrović E., Kovčić I. (2015): *Koža i derivati kože životinja*. Univerzitet u Sarajevu, Veterinarski fakultet, Sarajevo.
3. Kozarić Zvonimir (1997): *Veterinarska histologija*. Veterinarska izdanja, Naklada Karolina, Zagreb.
4. Mioč B., Sušić V., Pavić V., Barać Z., Prpić Z. (2006): *Priprema ovaca za strižu, striža i postupci sa vunom do transporta*. Stočarstvo, UDK 636.083.45, (129–141); Zagreb.
5. Mitić A.N. (1984): *Ovčarstvo*. Zavod za udžbenike i nastavna sredstva, Beograd.
6. Savić M., Dimitrijević V., Trajlović R., Vegara M., Dimitrijević B., Bećkei Ž., Petrujkić B., Cojkić A. (2014): *Selekcijski kriterijumi u organskom stočarstvu*. Veterinarski glasnik 68 (5–6), Beograd.
7. Savić M., Jovanović S., Vegara M. (2007): *Stočarstvo*. Univerzitet u Beogradu, Norwegian University of Life Sciences, 1–304, Beograd.
8. Vegara M. (1991): *Razvoj vunskih folikula pramenke u dobi od šest do 26 mjeseci*. Doc. diss., Univerzitet u Sarajevu, Sarajevo.

Rad primljen: 08.10.2019.

Rad prihvaćen: 01.12.2019.